

**MUNDUARI AZALERATU**  
Uxue Armental Barandiaran  
*Pasai-Antxo*

Zaila da ohartzea ezberdina zarela,  
bakardadea.  
Mundua besteentzat eraikia dagoela ikustean,  
etsipena.  
Mila buelta eman behar izatea besteek bakarra ere  
ematen ez diotenean,  
pentsatzea.  
Liraina zarela esan eta zergatik ezkongai zauden gal-  
detzean,  
deserosotasuna.  
Oraindik gizonezkoekin egona ez zarelakoan, ez  
dakizula zer den ona entzutean,  
nazka.  
Guraso eta lagunen aurrean zu zeu ez izan, arbuiatu  
ez zaitzaten,  
beldurra.  
Besteen aurrean zure benetako izaera eta gustuak  
ezkutatzean,  
lotsa.  
Besteen begiradak gainean sentitzean,  
presioa.

Besteenganako ezberdina ez izateko, hauei korrontea jarraitzean,  
uzkurtasuna.  
Zure bikotea dela jakin arren, “laguna” deitzen diotenean,  
mina.  
Kanpoko zenbait herrialdek heriotza zigorrak aplikatzean,  
tristura.  
Gehien maite duzun pertsonaren eskutik ibiltzean,  
deseroso.  
“Armairu” baten barruan egon besteak kanpoan jaio direnean,  
artegatasuna.  
Dena aldatzen da “armairu” horretatik ateratzen zarenean,  
askatasuna.  
Konturatzen zarenean printzesa guztiak printze baten atzetik ez dabiltzala,  
itxaropena.  
Gizarteak eraikitzen duen normaltasunaren aurka joatean,  
indarra.  
Zure besarkada jaso eta munduak pentsatzen duena ahaztean,  
zoriona.